

Ün'invista pratica illas lavuors da la chüra

Fin als 6 d'avrigl drivan 27 chasas da chüra in Grischun lur portas ed infuormeschan a giuvenils davart ils mansters illa chüra. Üna da quellas instituziuns chi mainan chasas da chüra es il Center da sandà Engiadina Bassa.

Previs da realisar l'eivna in lur chasas vaiva l'organisaziun Chasas da chüra Grischun (CCG) fingià da l'on 2020. Causa la pandemia proruotta quel on ha l'acziun però stuvü gnir spostada. Uossa però, cha'l Cussagl federal ha annullà las masüras cunter il corona-virus, ha l'organisaziun pudü realisar l'eivna. «Il böt es da muossar a giuvenils e collavuratuors potenzials cun arrandschamaints infuormativs individuals cha las chasas da chüra in nos chantun sun patruns da lavur attractivs cun persunas d'instrucziun ingaschadas», scriva la CCG. Il Center da Sandà Engiadina Bassa (CSEB) as partecipescha eir a quist'eivna. La respunsabla pella scolaziun pels mansters da chüra i'l CSEB es Sonja Schmidt.

Collavuratuors da 15 naziuns

«Pro nus as poja imprendder impustüt trais mansters, in duos ons assistenta/ assistent sandà e fats socials (tud. AGS), in trais ons specialista/specialist sandà (tud. FaGE) ed eir in trais ons specialista/specialist pella chüra», infuorma ella, «tuot quistas scolaziuns pon far pro nus eir creschüts complementarmaing al manster.» Il center da sandà Engiadina Bassa ha plüssas chasas da chüra, a Scuol la Dmura d'attempats Puntota ed i'l Ospidal la Chüra Lischana. Lura esa amo las gruppas da chüra Röven a Zernez e Chalamandrin in Samignun. «Sainza ils meidis lavuran i'l CSEB circa 183 collavuraturas e collavuratuors dals pajais Svizra, Italia, Portugal, Germania, Austria, Slovakia, Ollanda, Ungaria, Croazia, Serbia, Belgia, Tailanda, Ecaduoer, Lituania e Svezia», disch Sonja Schmidt. Co esa culla generaziun giuvna, ha il CSEB giuvenils avuonda chi imprendan il manster da chürunza e chürunz?

Duos plazzas füssan amo vacantas

«Fin uossa ans esa gratià quasi adüna dad occupar las plazzas da giarsunadi», constata Sonja Schmidt e disch cha quist on füssan amo libras üna piazza pel giarsunadi da FaGe ed üna per l'AGS. «Quants giuvenils chi s'annunz- chan cur cha nus scrivain oura üna piazza dependa ferm da l'annada, schi sun annadas be pitschnas badaina quai natüralmaing.» Ella agiundscha cha la quantità da giuvenils chi finischan la scoula saja limitada in Engiadina «causa sia posiziun a la periferia». La respunsabla pella scolaziun pro'ls mansters da chüra dal CSEB manzuna cha'ls giuvenils predschan la pussibilità da pudair far practicums i'ls differents sectuors da la chüra: «Per exaimpel illas chasas e gruppas da chüra, i'l Ospidal e pro la Spitex.» In quai chi riguarda la plü importanta premissa per imprendder ün manster da chüra disch Sonja Schmidt: «Essenzial esa chi s'haja plaschair da lavurar cun umans.» Flurin Andry/fmr

www.cseb.ch



La dmura d'attempats Chasa Puntota e l'Ospidal a Scuol culla Chüra Lischana fan part dal Center da Sandà d'Engiadina Bassa.

fotografia: Mayk Wendt